



REPUBLIKA E SHQIPËRISË
Komisioneri për Mbrojtjen e të Dhënave Personale
Komisioneri

Nr. 624/1 prot

Tiranë me 11 / 4 /2014

REKOMANDIM

Nr 31 ,datë 11/04/2014

Komisioneri për Mbrojtjen e të Dhënave Personale, bazuar në nenin 29 të ligjit 9887 datë 10/03/2008 "Për Mbrojtjen e të Dhënave Personale" i ndryshuar, ka kryer mbikëqyrjen dhe monitorimin e faqes të subjektit tuaj në internet www.plus.al.

Subjekti juaj në cilësinë e kontrolluesit nëpërmjet faqes në internet www.plus.al, në kuadër të ofrimit të shërbime dhe produkte për persona fizikë apo juridikë, mbledh, përpunon dhe ruan të dhëna personale të subjekteve të të dhënave (klientë/ pajtimtarë).

Përdorimi i teknologjive të reja përmes përdorimit të internetit lejon mbledhjen e lehtë, të shpejtë dhe përpunimin e një numri të madh të të dhënave personale. Përdorimi i këtyre sistemeve apo teknologjive sjell përfitime për kontrolluesit dhe për subjektet e të dhënave personale, ato gjithashtu paraqesin një sfidë për mbrojtjen e vazhdueshme të të drejtave themelore të njeriut. Këto të drejta, në veçanti të drejtat për mbrojtjen e të dhënave personale, nuk duhet të minohen ose dobësohen thjesht sepse këto sisteme e kanë bërë më të lehtë ose më fitimprurës përpunimin e të dhënave.

Mbledhja, përpunimi dhe ruajtja e të dhënave personale duhet të kryhen sipas parimit të respektimit dhe garantimit të drejtave dhe lirive themelore të njeriut dhe në veçanti të drejtës së ruajtjes së jetës private. Mbrojtja e të dhënave personale është një e drejtë themelore dhe është e sanksionuar edhe në Traktatin e Lisbonës. Karta e të Drejtave Themelore të Bashkimit Evropian parashikon se: "Gjithkush ka të drejtën e mbrojtjes së të dhënave personale në lidhje me veten e tij apo të saj. Të dhëna të tilla duhet të jenë të përpunuara në mënyrë të drejtë për qëllimet e specifikuar dhe në bazë të pëlqimit të personit të interesuar, ose në bazë legjitime të përcaktuara me ligj. Gjithkush ka të drejtën e aksesit ndaj të dhënave të cilat janë mbledhur në lidhje me të dhe të drejtën për të korrigjuar të dhënat".

Komisioneri konstaton se në faqen në internet (në fund të saj) parashikohet rubrika "Informacione ligjore", në të cilën përfshihen disa nënrubrika si: PLUS Communication Sh.A. Termat e përgjithshme të kontratës së pajtimit të sipërmarrësit; "Plus Communication" Sh.A. Për lidhjen dhe aksesin në rrjetin publik të komunikimeve elektronike; Rregullore e Privatësisë; Kushtet e Përgjithshme; Përjashtimi i PLUS nga Përgjegjësia mbi të Drejtat e Autorit.

Në këtë faqe janë parashikuar "Politikat e Privatësisë", (paketë rregullash) me qëllim informimin e klientëve/pajtimtarëve dhe personave që vizitojnë faqen mbi mënyrat e përpunimit të të dhënave personale, masat e sigurisë dhe ruajtjes së konfidencialitetit, të drejtat e subjekteve të të dhënave (klientë/pajtimtarë) dhe detyrimet e kontrolluesit. Politikat

e privatësisë synojnë sensibilizimin e klientëve dhe personave që vizitojnë faqen mbi rëndësinë e mbrojtjes së privatësisë dhe të drejtat që gëzojnë në këtë fushë. Autoriteti i Komisionerit vlerëson se përmbajtja e "Politikave të Privatësisë" është e plotë dhe në përputhje me legjislacionin për mbrojtjen e të dhënave personale, por është e nevojshme që kjo paketë rregullash të jetë një rubrikë më vete dhe e ndarë nga rubrika "Informacione ligjore". Kjo me qëllim që parashikimet mbi ruajtjen e privatësisë të jenë sa më të dukshme dhe drejtpërdrejt të aksesueshme nga klientët/pajtimtarët dhe personat që vizitojnë faqen e kontrolluesit "PLUS COMMUNICATION".

Autoriteti i Komisionerit gjithashtu vlerëson parimin e transparencës së çështjeve të ndryshme sidomos edhe në faqen tuaj të internetit si kontrollues, por thekson edhe rëndësinë e transparencës në përpunimin e informacionit të subjekteve të të dhënave në mënyrë që këta të fundit të kenë dijeni mbi: personat që njihen me të dhënat e tyre, qëllimin dhe mënyrën e përdorimit të të dhënave, kujt do t'i përhapen të dhënat, mbrojtjen e privatësisë etj. Për këtë arsye çdo individ/subjekt i të dhënave personale ka të drejtën e mbrojtjes së duhur të të dhënave të tij personale. Përpunimi i të dhënave personale duhet të lejohet për aq sa është i nevojshëm, i drejtë, i ligjshëm dhe proporcional.

Për sa më sipër:

Në zbatim të neneve 29, 30 dhe 32 të ligjit nr. 9887, datë 10.03.2008 "Për Mbrojtjen e të Dhënave Personale" i ndryshuar, si dhe nenet 107-109 të K. Pr. Administrative ;

REKOMANDOJ

1. Në zbatim të neneve 18, 27 të ligjit nr. 9887 datë 10/03/2008 "Për Mbrojtjen e të Dhënave Personale" i ndryshuar, "Politikat e Privatësisë" (në faqen tuaj në internet) të pasqyrohen në një rubrikë më vete, lehtësisht të dukshme dhe të ndarë nga rubrika "Informacione ligjore", me qëllim informimin e saktë dhe të drejtpërdrejtë të subjekteve të të dhënave personale.
2. Kryerja e këtij detyrimi të rëndësishëm të kryhet brenda një afati kohor prej 30 (tridhjetë) ditësh, nga momenti i marrjes dijeni të këtij Rekomandimi.
3. Me plotësimin e këtij detyrimi të njoftohet me shkrim pranë Komisionerit për Mbrojtjen e të Dhënave Personale;
4. Në rast mospërmbushje të këtij Rekomandimi, Komisioneri vepron sipas nenit 30, pika 2, të ligjit "Për Mbrojtjen e të Dhënave Personale" i ndryshuar, sipas të cilit "Komisioneri në rast shkeljesh serioze të përsëritura ose të qëllimshme të ligjit nga një kontrollues ose përpunues, veçanërisht në rastet e përsëritura të moszbatimit të rekomandimeve të tij, vepron sipas nenit 39 të këtij ligji dhe e denoncon publikisht ose e raporton çështjen në Kuvend dhe në Këshillin e Ministrave".

Duke ju falënderuar për mirëkuptimin,

KOMISIONERI

FLORA ÇABEJ (POGAÇE)

